

明清十大家尺牘

卷五
五

尤西堂尺牘目錄

賀督學程太史啟

賀張太守啟

賀嘉定劉明府啟

賀劉黃門啟

謝新安友人惠墨茶啟

夏日謝送團扇涼枕啟

謝人餽樂啟

代陳相公答馬總督啟

上龔總憲書

再上龔總憲書

上曹通政書

與宋荔裳憲副書

答周侍郎書

寄王大宗伯書

寓陳大司空書

公致王孝廉書

公留剡公住山書

公請物外禪師書

答蔣虎臣太史書

答蔣虎臣太史書

答黃九烟

答王阮亭

答王阮亭

答宋荔裳

追薦諸亡友啟

遺亡友湯卿謀書

戲與瑤宮花史書

尤西堂尺牘

賀督學程太史啟

伏以翰林通華蓋文星朗耀于西京綸閣對紫微旦月高懸於北斗借判花之大筆論定千秋懸視草之弘文起衰八代木天動色水鏡增輝恭惟某官鳳掖仙姿龍眠瑞氣兩夫子之理學能世其家太史公之文章可華於國風搖鈴索東歸院之金蓮日上花磚吟翻階之紅葉紫誥裁三管久仰儒宗黃麻似六經允宜師範持膺簡命爰執文衡暫謝承明之廬來設扶風之帳春風夜雪依然顧額門牆秋露晨泉蔚矣卿雲河漢彬彬文質將還商周盤誥之遺落落風馳頓洗燕趙悲歌之習採輶軒者十五必首周南取駉牝之三千遂空冀北他年河朔並照青藜此日關中遙瞻紫氣職擁書吳下捧檄遼西頗懷合組之恩生逢裸壤雅慕鳴琴之治遠適輦鄉瘦馬獨吟窮魚堪賦幸戴二天之覆兼叨一日之知地附桑梓溪分桃李三年魚素曾達龍門百尺鸞坡還親臯座未及望塵而拜敢先削牘以迎敬俟下風伏祈台照

賀張太守啟

恭惟某官三戟名家兩京雅望山陰道上著含鷄鳴鶴之才夕宿班中擅轉筋筭鞭之敏競千巖而爭萬壑胸吐青虹襟三江而帶五湖眼空白馬遂軫熊軾爰剖魚符朱幡飛香水之溪皂蓋駐錦帆之里衙時龍戶歌舞鷄陵上日馬人奔趨鶴市黃堂烟雨獨吟畫戟之詩翠幙管絃皆奏宸衣之操一襦五袴宛然麥秀家風五馬雙旌正爾專美勝地此十萬戶之福也其二千

石之良乎。治某吳下阿蒙。方外司馬。岸幘將軍之石。目斷吳山。杖藜孤竹之祠。懷深燕市。班荆
疇昔。每思霖雨三年。望氣今朝。又喜福星一路。兩地之交。如故二天之戴。可知龍門在望。悵虛
竹馬之迎。虎阜載馳。敬走素魚之寄。薄申燕賀。仰冀鴻誨。

賀嘉定劉明府啟

恭惟某官。天半朱霞。雲中白鶴。青藜照讀姓氏著于三韓。黃絹裁文。聲名騰于孤竹。學優則仕。
國爾忘家。上體天子已飢已溺之心。下憫斯民靡室靡家之苦。解衣推食。待以舉火者。百家秣
馬脂車。其究安宅乎千里。遂使鳩形鵠面。胥為豐沛之民。因之華轂朱輪。首擢范陽之令。爰飛
一鶴。夙駕雙鳬。製五袴于畛域。播兩岐于練水。應念責絲羅穀。易地皆然。何難簞食壺漿。舉斯
加彼。治弟本家吳下。遠宦遼西。繪流民之圖。有心鄭監。吹寒谷之律。無術鄒生。每歎仁人長者
之用心。能使鰥寡孤獨之得所。何幸北平之荒穀。復為南國之甘棠。桑梓皆華。泰苗如雨。門連
白馬。佇看騎馬之迎。塞絕盧龍。未遂登龍之願。敬修東臯。先遣雙魚。敢云置之袖中。幸勿麾之
門外。

賀劉黃門啟

恭惟某官。鯉首文章。魚頭梗槩。越石清剛之氣。日映青蒲。更生慷慨之風。霜寒丹匭。龍批不避
九重。嘉封事之忠。多觸何辭。四海知彈文之正。身輕似葉。名重如山。試欲歸來。方有清露新桐
之樂。深宮寤歎。已懷疾風勁草之思。封檢日邊。賜還天上。召賈生于宣室。還收痛哭之書。起謝

傳于東山。獨擅風流之譽。蒼生繫望。烏府增聲。某素仰斗山。幸親衡宇。索米長安之日。曾掃龍門。懸弧初度之辰。恭承兕觥。思趨松徑。喜御蒲輪。天子有爭臣。吾將洗搏而祝。聖朝無闕事。公且焚草以行。願聽鳳凰之鳴。薄申燕雀之賀。敬當負弩。佇俟彈冠。

謝新安友人惠墨茶啟

文房太守。墨號玄香。花苑通侯。茶封不夜。代郡爰稱鹿角。建溪厥印蟬膏。松烟出自廬山。石花產于蒙頂。兼斯二妙。獨有新安。烏聊山下。九作龍紋。靈巖洞中。片如玉乳。喜頒雙笏。足染三嫌。驚試一旗。遂消七碗。墨云黑。茶云白。價並千金。茶則新墨。則陳香。同三昧。傳家烏玦。如看劍脊之花。供佛紫茸。不數穆陀之樹。中山管子。對此忘形。陽羨書生。聞之短氣。試將墨汁。波及右軍之池。并取茶經。寫在仙人之掌。

夏日謝送團扇京枕啟

周王鵲翅。扇號游鯢。韋后豹頭。枕名辟魃。宋主畫成蟬雀。唐宮寶製鸛鵒。是物雖奇。非時弗貴。當茲消夏。祇取迎涼。蒲葵窈窕。謝公捉此欣然。桄榔櫟櫟。張子賦成率爾。七輪持贈。不殊元寶。龍皮雙槩。搗來可比商山鹿角。倚烏皮之几。麈尾同揮。卧白石之牀。魚鬚共捲。豈止班姬紉素。裁作合歡。玉女紅粧。題為益壽。許持障面。不教憔悴王郎。取代曲肱。儘足逍遙莊子。庾亮南樓之上。習習生風。陶潛北窗之前。予于入夢。

謝人餽藥啟

僕風月膏肓。煙花痼疾。同馬卿之消渴。比盧子之幽憂。忽啟雙魚。如逢扁鵲。贈之芍藥。投我木瓜。紫蘇與白芷同香。黃蘗共紅花相映。雖云小草。即是大丹。月宮桂樹。竊自姮娥。台洞桃花。採從仙女。一杯池水。堪資文室之談。半七神樓。頓醒釣天之夢。肺腑能語。羊叔子豈有酖人耳目。發皇。楚太子無勞謝客。

代陳相公答馬總督啟

伏以青袍白馬。干城生玉帳之威。紫蓋黃旗。甲仗壯金壇之色。堯北門之鎖鑰。德雨千家。繡東國之衣裳。福星一路。天子命之六月。老臣誦以清風。恭惟某官。奮跡從龍。膺符分虎。名標銅柱。伏波之家。世堪傳策。著金城橫海之樓船。足紀六韜三畧。有熊羆虎豹之才。八陣五花。得天地風雲之氣。萬邦憲其文武。四國待以蕃宣。爰駕雙車。往綏三輔。鸞書玉軸。降自宮中。壽甲瑤戈。專于閭外。鎖將金鎖。印銷海岱之烟。鈎用玉鈎。簾捲燕臺之月。綸巾羽扇。鐵如意指揮三軍。緩帶輕裘。金僕姑獨當一面。漁陽老將。皆隨赤羽之旂。魯國諸生。半入紅蓮之幕。河山萬里。歌舞紛來。雲日九重。股肱斯托。某海隅固陋。冀北駑駘。濫吹竿于金門。懼覆餗于玉鉉。延英東閣。思范公數萬甲之才。議事南衙。求孫子十三篇之畧。庾樓在望。每懷風月之談。李壁方新。長燭斗牛之氣。有書尺一。辱文藻之續紛。其車三千。佇武功之赫濯。路車乘馬。遠慚雙鯉之投。玉案金刀。未展七襄之報。

恭惟閣下北斗上公。南山君子。起大小龔之後。卓爾不羣。介左右流之間。巍然獨秀。有鐵石梅花之氣概。兼山川香草之風流。鼓吹六經。而丘索典墳。如琴瑟笙簧之並奏。鹽梅九鼎。而兵農禮樂若羔腍蟲犢之咸宜。爰戴興鳩。白雲起而圓扉鞠草。俾專司馬紫蓋見而玉帳生風。久造膝于席前。遂彈冠于柱後。擅烏府先生之望。七貴泥樓。聽聽馬御史之謠。三公避路。摧剛直枉舍狐狸。而問豺狼指佞觸邪。視鷹鷂之逐鳥雀。霜風捲地。霖雨回天。朝廷頒其議于政事之堂。則為快活條貫。草野錄其書于金石之錄。皆曰忠愛文章。總一臺之紀綱。榻橫豸角。秉九流之刀尺。簪盍龍門。庶乎得聖人之清。如此任天下之重。雖兒童走卒。盡知安石之為蒼生。況屬吏門生。不仰季長之有絳帳。聞風能立。親海思歸。伺吳下阿蒙。南州孺子。操三尺管。輒輕千騎。東方擁五車書。漫擬百城南面。十年不遇。遂令鄧禹笑人。四海無儔。未見鮑生。知我臣飢欲死。壁立相如。予去何之。塗窮阮籍。竟折腰于五斗。將糊口于四方。仕有時乎為貧。顧慚小草。出無辭于排難。正遇盤根。遠戍功名。端憂歲月。王粲登樓之日。淚滿青衫。班超出塞之年。愁生白髮。李將軍之故地。夜聽邊聲。王車騎之間曹。朝看典氣。文成鸚鵡。禍衡悲尸家之間。跡寄鷓鴣。張華感樊籬之下。翟尉之門羅雀。松菊無存。史雲之釜生魚。樵蘇不爨。焚琴煮鶴。一飽無時。納履捉衿。孤寒何地。坐然明于堂下。孰許論心。逢甯戚于車前。誰憐扣角。鸞臺鳳閣。無非甲乙之才。羊野礪溪。終是斗筭之器。以家門考經濟。則由求從政。甯居陽貨之先。以科第論文章。則李杜稱詩。必出顏標之下。自非九方相馬。肯略牝牡驪黃。或者大匠掄材。不棄輪囷枯朽。荆山不剖。卞

和泣血以相明。豐城久埋雷煥望氣而自躍。鍾期未遇朱絃無三歎之音。殷郢當前鉛刀有一割之用。求人非易。知己良難。昔國子先生屢上書于宰相。汝南太守亦自贊于康成。愚固不倫。願實相等。措模在望。孔融登元禮之門。奇字滿牀。侯芭入子雲之室。敢言桃李。聊借參苓。伏望尺寸兼收。斗升分潤。操其長綆。援絕壑之行人。假以餘光。照寒鄰之績女。老驥伏櫪。尚効馳驅。飛鳥依人。甯忘飲啄。苟以蟲臂鼠肝為足用。將附龍鱗鳳翼而彌彰。至乃風雅一塗。不啻編摩。數載湘東三管。筆冢曾封。鄴下五言。詩城自築。登山臨水。不無刻羽之聲。弄月嘲風。每有雕蟲之悔。方外司馬。長嘯恒多。江東步兵。短歌間作。辟草螢之吟。雨雹。真布鼓之過雷門。所賴弘獎風流。抽揚月旦。排沙簡寶。舍短收長。點鐵成金。改嫫作好。筆則筆削。則削。一字南金。步亦步趨。亦趨。終身北面。小子有造。荷明師之教成。大言不慚。資鉅公之絕倒。

再上龔總憲書

語云。士為知己者用。女為悅己者容。然則士非知己。固無可用之日矣。夫使士終身不遇知己。而不用。或誤為不知己者所用。二者皆無足惜。惟是遇知己矣。上欲援之。而阻于格。下欲攀之。而懸于勢。逡巡却顧。而時已去。機已失。使知己有不獲用士之憾。使士有不克効用知己之羞。斯足為天下所大痛耳。今有畜千里之馬者。以駕鹽車于九折之坂。旁人不識也。伯樂過而識之。其馬淒然長嘶。伯樂亦潛然流涕。乃告其主曰。此良馬也。又稍稍語其旁人。然是馬也。風霜憔悴之形。厓谷顛踣之狀。皮相者無一取焉。且田野之子。農行三十里。賈行五十里。乘千里馬。

女之雖其旁人亦無能以千金市之者。設有圉人牧吏飾以金羈絡以玉勒騎而致之長安大道之東洛陽小苑之西星飛雷躍光采炫耀左右歎羨價增十倍然是馬也甯老死于九折之坂而不願為圉人牧吏所得何者感伯樂之一顧而思為之用也。今世所謂伯樂者舍閣下其誰哉攬四方之紀綱秉百工之刀尺位已尊矣望已隆矣文章經濟赫然稱當代一人矣而猶傾心于下吏肯首于愚生褒尺寸之才揚纖毫之美故長安四方之士郵相傳說莫不慕閣下之知侗為特奇而幸侗之受知于閣下為獨至也。然侗之年已踰三十矣跼蹐于卑官棲遲于絕塞者三年于茲矣。今秋一病五十餘日假使三日不汗七日不食則卒然溘霜露填溝壑雖欲長侍門牆豈可得哉。又使掌銓衡者計其年限等其資格授以遠方一丞則侗必流離坎壈于山巔水涯之外終不得奮其舌而昂其首否則南山之南北山之北侗將長為農夫以沒世而玉階方寸地迄不敢望焉。侗固已矣獨使長安四方之士郵相傳說以為有知己如此而士尚不用有士如此而尚不為知己用相須何殷相遇何殊有不慕者轉而為歎幸者變而為悲哉。昔馬周年僅四十餘耳太宗及其壯而用之遂成貞觀之治賈誼年亦三十三文帝知而不用竟死長沙向使文帝及賈生之壯而盡其才功名豈在馬周下而二子遇不遇懸殊者則以賈誼排于絳灌馬周引于常何士固伸于知己而詘于不知己者諒矣。夫才雖天生而器由人造豫章之才莫不知其良也荆山之璞莫不知其貴也然木與石默而不言一旦有匠焉斧之鋸之曲之以為輪轅方之以為門戶有匠焉琢之磨之雕之以為杯棬飾之以為佩環而木與玉

終無言以自明。馬徒使建章之擣櫟。明堂之砮砮。笑人千載。而其時即有卞和郢石者。見亦相與悔恨而莫及。豈不哀哉。然馬之遇伯樂。木之遇郢石。王之遇卞和者。十有八九。其不過者偶耳。顧與其流涕于未遇之時。悔恨于不遇之後。不若馬之善鳴。木與王之能言者。脫田野之足。去拙匠之手。不為園夫牧吏所得。與擣櫟砮砮所笑。故以狂瞽之言。陳于知己之左右。幸憫而察之。

上曹通政書

伺聞之。自銜自媒者。士女之醜行也。于時求進者。道家之明忌也。是以毛遂贊于趙相。君子譏之。方朔驚于漢廷。賢者為恥。語曰。抱壁途乞。無為貴寶。儒者大雅。固不屑矣。然而騏驥逐九折之坂。見伯樂而長嘶。梧桐生于千仞之岡。遇子牙而發響。何則。相皮者衆。知音者希。鹽車雖困。不邀剪拂于圉人。梁木雖隆。不吐宮商于匠石。此越石求伸于知己。昌黎嘗遇于大賢。豫讓許身于知伯。侯喜矜色于盧公。古既有之。今亦宜然。夫車鐸至微。荀勗取以和樂。嬰材垂朽。蔡邕斷以成琴。牛溲馬渤。而越人求之。竹頭木屑。而陶公不棄。是故物無美惡。當時則貴。士無賢不肖。遇人則名。遠跡入宮。目以蛾黛。登進配于雕胡。撥其枝葉。則椒蘭無馨香之芳。假其羽毛。則燕雀有飛鳴之勢。所以蟠木求其先容。圭璋貴乎特達。兩美必合。尚庶幾焉。恭惟閣下四海偉人。千秋作者。文章高視。西京意氣。比倫東國。如泰山北斗。莫不仰其高。而景星慶雲。爭先覩為快。方今大道平康。四門雍穆。鴈鷺盈于九列。夔龍布于兩階。而閣下于于焉。至諤諤以昌

作朕股肱。為王喉舌。宣室之論。天子獨重賈生。武帳之奏。公卿皆憚汲黯。矧夫蓬茅布褐。郡邑簪纓。接其丰采。草木之藉陽春。承其美談。魚龍之逢風雨。有不延頸龍門。摩肩鐵限者哉。若侗者。江表腐儒。廬中窮士。讀古人書。五經六藝之說。既聞其詳。友天下士。三君八及之名。亦知其概。志大而才不逮。氣矜而力不足。名隨謗至。命與仇謀。書十上而不行。學三年而不設。易衣并日。悲歎窮廬。于是遠追抱關之義。近維捧檄之心。身既可以許人。仕有時乎為養。夫莊周游戲于漆園。曼倩浮沉于金馬。達人之高致也。長孺薄淮陽而不為。士元守未陽而不治。志士之遠謀也。以侗視之。皆非其比。自無舊業。敢恥微官。一命雖卑。陳力就列。孰意蹇而又蹇。放此邊陲。長沙卑濕。賈太傅之傷生。潯陽蕭條。白司馬之掩泣。既謝投筆之功。但增掣肘之患。頗抱鳴琴之興。時懷索米之憂。數不飽而兒啼。賦無衣而婦歎。涼風九月。塞雁南飛。哀杵亂鳴。悲笳互動。望長安而日遠。睇吳市而雲飛。秦公子之登樓。楚大夫之處廓。感時撫景。惆悵何言。亦嘗驤首青冥。思自奮激。而泥塗偏促。振拔無由。唐人謂三十老明經。五十少進士。以侗年境當之。正子桓所云已成老翁。但未頭白耳。夫漢以策取士。而班馬楊雄不與。唐以詩制科。而李杜浩然遺之下者。勿論。豈子虛太玄不及公孫春秋。北闕南山。不如湘靈鼓瑟乎。然非破拘攣之見。馳域外之觀。鮮能物色于風塵。網羅于廖廓。世俗悠悠。奉明經為鴻寶。秘聖書為金科。執斯以擲。則屠釣胥靡。終非俊物。質郎掾吏。必乏奇才。磊落不羈之士。有槁死岩穴。投老遐荒耳。惡能揚眉抗手。陳誠懇于本朝。行話談于當路哉。雖然。甯戚不恥飯牛。而商歌以感管仲。王猛不羞捫蝨。

而雄辨以動桓公。李太白上書相國。而自署海上釣鰲客。王適投刺將軍。而自名天下奇男子。侗雖不敏。請侍下風。倘不麾之門外。則升堂入室。小子何敢讓焉。金非莫邪。而類躍冶。王豈連城。而將泣血。賤似葑菲。而思下體之採。質同駘駘。而求一顧之知。齒牙餘論。願先生勿惜也。侗自束髮。學為詩歌古文詞。慕吉甫之穆若。懷德璉之斐然。戶牖都着。刀札遂有。然昌黎以為大慙。子雲悔其少作。世無玄晏。則太冲三都。未免覆瓿耳。以閣下黃初家世。正始元音。金石笙鏞。會聳而鼓。秋水向若。奚啻大巫。顧鳳輝丹穴。華蟲猶飾于林中。虎嘯谷風。蟋蟀尚吟于床下。雖不自諒。各有所長。青蓮烏夜之作。賀監解貂。昌谷雁門之行。文公束帶。才雖愧于古人。事實希于往轍。絕塞無友。俗吏寡聞。竊恐刻鵠不成。探驪未得。守井蛙之見。貽遼豕之嗤。敬錄篇什。仰陳函丈。幸而教之。感且不朽。以筴撞鐘。以蠡測海。故言無章。伏望寬其督責。少垂察焉。

與宋荔裳憲副書

前者仙舟經于敝邑。殊乏芟蒲之獻。虛邀蓬華之輝。顧影知慚。望塵增悵。恭惟閣下爰自燕山。聿綏海甸。風流吐納。襟三江而帶五湖。才略縱橫。競千巖而爭萬壑。黃旗晝見。紫氣秋高。某本孤蘆。有如樗櫟。嘗仰昌黎之北斗。得交安石于東山。邂逅登龍。追隨附驥。竊訂千秋之雅。相將十載于茲。至如季布居官。恒遭謗議。屈平去國。不乏離憂。每荷包空。更加推轂。此拔山超海。負德難勝。垂露懸針。書恩不盡者也。惟是放逐以來。窮愁日甚。叩門乞食。終無一飽之歡。閉戶著書。未免單寒之苦。歎遭逢其已矣。矢報効以何從。信乎枯木朽枝。無取才于哲匠。或者遺簪墜

履不見棄于仁人。決西江之水可活枯魚。垂北海之雲自依窮鳥。雖有駑馬。差許驅馳。毋論鉛刀。亦堪剗割。度幾田文門下。仍留長缺之賓。庾亮樓中。不去胡床之客。既兄行李。時候旌麾。率爾無文。定資絕倒。

荅周侍郎書

僕束髮受書。即知中州有元亮先生。昌黎所謂景星慶雲。潁濱所謂高山大河也。今乃得登龍門。親燕笑。不勝喜慰。二十年夢寐為不虛矣。僕亦嘗北走燕趙。南入閩越。中歷齊魯。楚豫之區。求當世之大人先生者而從之。遊大約錢穀之外。別無政事。簿書之外。別無文章。拜跪之外。別無面目。酒食之外。別無肝膽。天下士有投一刺獻一書者。不標之大門。則束之高閣耳。嗟乎。被龍章于裸壤。奏韶樂于聾俗。誰為為之。孰能聽之。此虞生所以數恨于青蠅也。求其下士之誠好文之篤。如閣下者。有幾人哉。信乎相須之殷。而惜乎相見之晚。使僕于二十年前。遊大賢之門。稍得吐捫蝨之談。奮雕蟲之筆。斟酌千秋。馳驅萬里。或有可觀。小草雖微。亦藥籠中物也。至今日。周游晚歸。風雨相半。焚書瘞筆。投老空山。雖有尺寸之才。亦焉用文之而已。雖然。僕之向往。則有在矣。濟南生云。國家無吾輩文章之士。則鳳鳥不鳴于岐山。而仁獸化為禱杙。夫麟鳳雖不常生。然必間世一出。不然者。怪鴟登壇。野干執幟矣。鷦鷯決于榆枋。亦慕丹山之彩。驪黃蹀于棧樅。亦仰大角之祥。惡有對怪鴟而長鳴。朝野干而率舞者哉。承頒大集于大江中。讀之砰礚澎湃。與潮音相答。洵奇觀也。尺牘一選。尤見精詳。子桓稱元瑜書記翩翩作樂。而劉公一

紙至賢于十部從事。豈小道哉。竊不自揣。錄近作數首。呈之典籤。明鏡在前。雖嫫母無所匿其醜矣。亡友湯卿謀。少年早夭。其遺集湘中草。可以傳世。而未得其人以傳。知明公于存沒之誼最深。故摘其尺素數則。寓覽。此未足盡人才之萬一。蓋哀其無聞。庶乎附作者以彰焉。伏惟留意。

寄王大宗伯書

侗自辭絳帳。遂出青門。策蹇足以言旋。挂征帆而長往。于斯朱夏。爰渡黃河。雖去國之悲。平生已矣。而歸田之適。意氣浩然。松菊猶存。琴樽無恙。便當躬披短褐。手執長鑱。釣魚東海之濱。種豆南山之下。聊云卒歲。敢曰違時。惟是刀筆小吏。受至尊之知。章句庸儒。奉大賢之教。而功名不立。學業無聞。霜露忽周。草木同腐。以此抱愧。未能解憂耳。然而易著見幾。書稱知命。侗雖不敏。請事斯言。所賴仰託門牆。俯哀溝壑。知白雪之寡和。附青雲而益彰。苟達微忱。甯愁遠道。時因羽使。率候興居。書不盡言。翹首而已。

寓陳大司空書

侗嘗聞之古人曰。薦賢為國。非為私也。而語又云。士為知己者用。二說似相反。而實相成也。夫拜爵公朝。謝恩私室。君子非之。然揆之人情。有不能已者。士當貧賤之時。居無鄉曲之譽。出無廓廟之援。名沒齒而不稱焉。設有一人。哆口而譽之。垂手而援之。俾得奮其舌而伸其筆。雖未榮貴其身。鮮有不感于心。動于色。流連慨慕。而不能忘者。虞翻所謂天下得一人知。已可不恨。

也此在比肩之輩尚為刎頸之交而況遇合于鉅公見推于大賢乎鄒陽有云無因而至前雖出隋侯之珠夜光之璧祇足結怨而不見德有人先容則枯木朽株樹功而不忘信乎莫為之前雖美弗彰士之待舉亦猶是矣顧古之薦賢者舉爾所知而已周公之時執贄而見者十人還贄而見者三十人貌贄之士百餘人趙武所薦白屋之士莞庫者六十家豈必人與之相得家與之相識哉今之薦賢者則異是非有肺腑之戚則弗親也非有銜盃酒之歡則弗信也無左右乎繆公之側則弗思也不日掃平陽之門則弗見也雖有盛名之下觀聽望深而聞聲相思進前不御者多矣何者人未易知知人不易恐其名不副實因而累我也怨不酬德反而負我也蓋陳劬舉茂才不以實削戶二百何武舉正直者盤辟失禮亦坐左遷至李德裕薦白敏中不惟背之又下石焉是以當路公卿雖其平生握手之交猶豫而不敢任囁嚅而不肯談況乎越拘攣之議馳域外之觀用心于無望之地施恩于不報之人哉若閣下之與侗雖吳越相去三百餘里未嘗一望見顏色也以大司空之尊俯視邊庭散吏不啻上下牀之別也侗之歸田灌園已二十年矣未嘗有人書寸牘及長安貴人之門也雖有謬悠之說荒唐之言著之詩文傳於流俗者其為技亦已薄矣且少不如人老將至而耄及之其學業進否未必有加于昔也而閣下毅然獨斷選于衆人之中達于天子之側此非深知侗者不能今也皇上親試闕庭猥蒙採錄擢之侍從之班令以纂修之職則庶幾奉命承教可幸無罪矣若侗自揣樗櫟之質非懷楸之需締綌之材無黼黻之用萬一奏對不稱上旨擯斥而去固其所也豈不羞門牆而

貽笑當世之士乎。誠不知閣下之知侗者何等。其舉侗者又何說也。雖然閣下之知侗深矣。而侗尚未能受知于閣下者。侗放廢已久。且有犬馬之疾。杜門却軌。長為農夫以沒世。其出山之思。如牧羊者之鼓吹車蓋。未嘗夢及之也。一旦奉詔重登仕籍。身本吏也。豈敢驕語高尚。但以麋鹿之性。被犧牛之文。既不合時。亦違所好。去秋復遭亡妻之變。悲傷涕泣。方寸亂矣。雖欲勉自修飾。以圖報稱。其道無由。前曾詣部請急。例不見許。稍俟史局告成。便當上表陳情。乞骸歸里。釣魚種豆。以終餘年。此侗之素志也。然則侗固不能為知己用。即閣下亦焉用侗為哉。閣下固未嘗與侗相見。但聞吳下有此阿蒙耳。亦未知侗之類唐潦倒。一至於此。然其薦賢為國之心。出于誠然。而不為公門桃李計耳。此固一人信之。羣公諒之。而侗所流連慨慕而不能忘者。此也。侗以一介書生。往受先帝凌雲之賞。今皇上起之草茅。置于翰苑。兩朝知遇。雖子雲相如。殆無以過。而閣下與大司馬王公前或推之後。或挽之。獎進踰分。誠非所堪。然侗得知己于吾君。吾相。亦已足矣。豈必日受千金之賞。一歲九遷其官乎。侗之赴詔。值閣下奔喪南還。未獲晉謁。都門羈縻。侍側尚未有期。敢以奏記先之。然叔向不謝祁奚。而韋澳唐介亦恥呈身識面。侯問之不時。儀文之不備。皆非閣下之所責也。侗再拜。

公致王孝廉書

愚聞春秋責備賢者。蓋以忠孝節義之事。惟賢者能為之。人有忠孝節義之事。亦惟賢者能曲成之。樂與之。雖詩書所載數千年以上之事。聞之莫不喟然嘆興也。況生在同時者乎。雖道路